

**Pakatan tidak tolak RAPID, tidak setuju tanah diambil, kata Salahuddin
Malaysian Insider
30 September, 2012
Oleh Mohd Farhan Darwis**

PENGERANG, 30 Sept — Pakatan Rakyat (PR) tidak menolak pembangunan projek Hab Penapisan Minyak dan Petrokimia (RAPID) di Pengerang, sebaliknya Naib Presiden PAS Salahuddin Ayub menegaskan, pembangkang mahu ianya dilaksanakan di kawasan tanah milik kerajaan, bukannya melalui pengambilan tanah kampung tradisi di sini.

Menurut Salahuddin, pendirian PR jelas untuk tidak menolak pembangunan, malah beliau turut berkata PR menerima projek ini jika ia dilaksanakan seperti di Kerteh dan Paka di Terengganu yang tidak dibangunkan atas pengambilan tanah penduduk.

"Kita terima projek ini ... kami terima pembangunan, dan pendirian kita jelas.

"Petronas boleh buat seperti di Paka, Kerteh ... jangan musnahkan kampung tradisi," katanya merujuk kepada tujuh kampung tradisi yang akan dipindahkan ekoran tanah mereka diambil untuk projek RAPID yang bernilai RM60 bilion itu.

Chua Jui Meng: Janji Pakatan Rakyat.

Bagaimanapun, dalam ucapan Pengerusi PKR Johor, Datuk Chua Jui Meng, yang berucap mewakili Ketua Pembangkang Datuk Seri Anwar Ibrahim, berkata PR akan menghentikan projek tersebut sekiranya pakatan itu berjaya menguasai Putrajaya.

"Jika kita tidak menang kes ini di mahkamah, ini mesej Anwar kepada anda semua ... bila beliau jadi perdana menteri, projek RAPID ini akan dihentikan.

"Ini janji kami hari ini ... dan kami akan bantu kehidupan anda semua di sini," katanya disambut sorakan dan tepukan gemuruh peserta demonstrasi Himpunan Hijau Lestari di Pengerang pagi tadi.

Salahuddin turut menjelaskan, pihaknya yakin isu RAPID ini bakal meruntuhkan tembok kubu kuat Umno BN di selatan tanah air itu.

"Ia beri isyarat jelas kepada BN Johor, jangan main-main dengan undi rakyat ... jangan anggap kubu kuat di Pengerang sebagai satu tebusan, dan mereka boleh buat sewenang-wenangnya.

"Gelombang perubahan akan bermula di selatan dalam pilihan raya umum ke-13 kali ini, ia tidak lagi bertempat di Kuala Lumpur ... ia akan berpusat di selatan tanah air, di sini," tegasnya kepada The Malaysian Insider.

"Pengerang ini tempat yang jauh, tapi ramai orang boleh datang. Itu isyarat jelas buat BN di Johor," kata pengerusi Mantap itu lagi, sebuah NGO yang ditubuhkan PAS bagi menangani isu pengambilan tanah di Pengerang.

Jelas ahli Parlimen Kubang Kerian ini lagi, PR juga tidak melihat isu Pengerang sebagai kelebihan politik untuk mereka, sebaliknya ia hanyalah tanggungjawab mereka kepada rakyat.

"Kita hanya memperjuangkan isu ini, tidak sangat kepada tujuan politik," tegasnya kepada The Malaysian Insider.

"Kalau saya bertanding di Pengerang, ada jaminan kita boleh menang? Kalau PR bertanding di Pengerang adakah kita boleh menang? Kita hanya perjuangkan rakyat.

"Politik adalah suatu perkara yang datang kemudian ... sama ada kami berjaya atau tidak kerjaya politik kami, rakyat yang akan kami perjuangkan dulu."

Justeru, beliau juga berkata akan membawa isu ini untuk dibincangkan di Parlimen supaya ianya mendapat liputan meluas di peringkat nasional dan juga antarabangsa.

Hakcipta © 2012 The Malaysian Insider

Source:

<http://www.themalaysianinsider.com/bahasa/article/pakatan-tidak-tolak-rapid-tidak-setuju-tanah-diambil-kata-salahuddin/>